

# Malaysia kutuk serangan Israel

## Tindakan keji, biadab rejim Zionis terhadap penduduk Palestin Ramadan terakhir

Oleh Redzuan Muharam  
bhnews@bh.com.my

**Putrajaya:** Malaysia menyifatkan serangan udara tentera Israel di Semenanjung Gaza semalam yang mengakibatkan kema-

tian dan kecederaan rakyat Palestin termasuk kanak-kanak, sebagai keji dan biadap.

Perdana Menteri, Tan Sri Muhyiddin Yassin, berkata serangan itu yang dilakukan ketika hari terakhir Ramadan juga tidak menghormati umat Islam seluruh dunia.

"Malaysia menuntut Israel segera menghentikan kekejamannya terhadap rakyat Palestin di wilayah diduduki, termasuk yang berada di Semenanjung Gaza.

"Kekerasan secara berterusan Israel terhadap rakyat Palestin, terutama pada bulan suci Ramadan, tidak boleh diterima sama sekali dan rejim itu wajib diper-

tanggungjawabkan," katanya dalam kenyataan media, semalam.

Sambil mengecam keras tindakan rejim Israel itu, Muhyiddin berkata, masyarakat antarabangsa tidak boleh menutup mata, berdiam diri dan tidak menghiraukan kekejaman yang dilakukan oleh rejim itu.

Katanya, Malaysia menyeru masyarakat antarabangsa terutama Majlis Keselamatan Pertubuhan Bangsa-Bangsa Bersatu (PBB) supaya bertindak tegas dan mendesak Israel menghentikan segera kezaliman terbaru terhadap rakyat Palestin.

"Masyarakat antarabangsa juga perlu bersama-sama meng-

"Malaysia menuntut Israel untuk segera menghentikan kekejamannya terhadap rakyat Palestin di wilayah yang diduduki, termasuk di Semenanjung Gaza



*Muhyiddin Yassin,  
Perdana Menteri*

gembleng usaha bagi melindungi rakyat Palestin daripada tindakan ganas Israel.

"Dalam waktu sukar ini, Malaysia sentiasa memberi sokongan padu dan mengukuhkan solidariti dengan rakyat Palestin.

"Malaysia turut mengulangi pendirian menyokong penubuhan sebuah negara Palestin yang merdeka dan berdaulat menerusi penyelesaian dua negara berdasarkan garis sempadan pra-1997, dengan Baitulmaqdis Timur sebagai ibu kota Palestin, yang juga satu-satunya penyelesaian terbaik

konflik Palestin-Israel," katanya.

Perdana Menteri berkata, serangan kejam, melampau dan keterlaluan Israel itu terang-terangan menyalahi undang-undang antarabangsa.

Beliau berkata, Malaysia turut mengulangi rasa kesal dengan serangan ganas dan pencerobohan berterusan tentera Israel terhadap rakyat Palestin dan umat Islam yang beribadah di Masjid Al-Aqsa sejak 7 Mei lalu serta pengusiran rakyat Palestin di Sheikh Jarrah di Baitulmaqdis Timur.